

Departamento di Cultura a reuni cu AHATA riba desaroyo nobo pa gruponan folklórico Arubano



ORANJESTAD (AAN) -Departamento di Cultura Aruba (DCA) a reuni cu Sr. James Hepple, Presidente & CEO di AHATA hunto cu Sra. Vanessa Rasmussen, Adm. Manager den luna di november 2014. A trece dilanti loke ta e plan di maneho nobo pa loke ta gruponan Tipico, di Baile y Caha di Orgel, manera ta deseo di Minister di Turismo, Transporte, Sector Primario y Cultura Sr. Otmar Oduber, cual ta pa promove nos cultura y mantene nos musica folklore bibo. Tambe a relata e motibo principal di e bishita cu ta pa duna oportunidad na e gruponan local e posibilidad pa haci presentacionnan, den lobby, banda di pool y tambe restaurant di hotel. Mescos ta conta pa e gruponan di baile y caha di Orgel.

E combersacion a bay den un bon ambiente. Di banda di AHATA tambe a haya cu ta un bon idea pa promove nos musica folklore, cual ta hopi importante. Nan a laga sa cu un bon momento pa laga un grupo Tipico presenta der lobby di hotel, ta ora di check-in y lo scoje un bon skina pa e grupo Tipico musical, di

Baile y Caha di Orgel. Hasta diferente nombrenan di hotel a wordo menciona caminda tin e posibilidad pa cu e peticion cu DCA a trece padilanti.

Un sugerencia cu a bin dilanti di parti di AHATA ta pa si Departamento di Cultura mes por tene control y supervision di esaki. Motibo ta pa evita cierto inconveniencia y tambe duna un "fair chance" na e gruponan Tipico, di Baile y Caha di Orgel. Otro sugerencia mas cu a bini dilanti cu si DCA por contact esnan cu ta haci "*Group Reservation and activities*" manera: Ecco Destination, The Palm Tours, Epic Aruba N.V. y Every Aruba Events Specialist pa ora nan trece cierto gruponan di exterior por tin posibilidad cu nan por

haci uzo di gruponan Tipico, di Baile y Caha di Orgel durante nan actividadnan festivo. Otro sugerencia cu a bin di parti di AHATA ta si e gruponan Tipico, di Baile y Caha di Orgel por atende e "Aruba Certification Program", miho conoci como Mi Compromiso cu Aruba duna den edificio di Enseña Pa Empleo (EPE) na unda cada un persona ta bira un embahador di Aruba prepara cu conocimiento di su Cultura.

Na final di e reunion, AHATA a ricibi un copia di e plan di e maneho nobo cu ta trata di e gruponan Tipico, di Baile y Caha di Orgel for di representantenan di Departamento di Cultura.